

Koblenzer Mundart:

Zwei Probleme

Kenner ginn net gere schlofe,
sein des Ohmens niemols meed,
lautstark moß die Modder rofe:
„En die Fall, et es schuns spät.

Wenn dat Sandmännche gesunge
on sei Märche hat verzehlt,
es fier euch dä Daach verklunge,
fort met euch - on net gequält.“

„Ich well noch dä Krimi gucke“,
säht dä Griefste, knapp neun Johr,
bleift steif vur der Mattscheif hucke.
Drauße quietscht dat Gaardedor.

Zo Besuch kimmt noch die Uma,
hat en gode Rot parat.

„Fernsehimmel“ es ihr Thema,
wie dä heut der Kendheit schadt.

„Weil ich emmer mit de Bibbcher
jede Ohmend schlofe ginn,
sein ich su gesond, ihr Liebcher“,
get die Uma zo verstinn.

„Wie kimmst dau dann roff die Leider?“
frägt verdutzt dä kleine Schang,

„Umache, verzehl doch weiter,
on wie kimmst dau off die Stang???“

Katharina Schaaf

Juli 1966